



Siverth K. Heilmann

**22. Maj 2019
UPA 2019/197**

Angallatit tingerlaatillit nunatsinnut tikikkaangamik isaaviup kingumullu nunatsinniit aneqqinnissamut isaaviup nakkutigineqarnissaat atatillugu apeqquteqaat aallaavigalugu inatsisartut oqallinnissaannik siunnersuut.

(Inatsisartuni ilaasortaq, Laura Tánâjik, Siumut)

Siunnersuuteqartoq inatsisartuni ilaasortaq Laura Tánâjik, Siumut, apeqquteqaat aallaavigalugu oqallisissiaqarninnut soqutiginarput qujanaq, imatullu Atassut-miit oqaaseqarfigissavarput.

Siunnersuuteqartoq ilumoorluinnarpoq, ukiuni kingullerni imaatigut angallanneq aasaanerani aallartikkaangat, Nunatta avataaniit, angallatit tingerlaataannalinnik taasartakkagut, Nunatta sineriaanut sumut tamaanga tikerartarnerat nalinginnaaleraluttuinnarmat.

Qangaanerusoq politiitut sulininni, nunami allamiunik tikittoqassatillugu, Qallunaat nunaanniit, nunani allani ministeriaqarfimmiillu ilisimatinneqartarpugut (opholdtilladelse-imik) akuersissuteqartoqarsimanerani, tamannalu nalinginnaasumik qaammagini pingasuni sivilisussuseqartarpoq, sivitsuiniartoqarpallu aatsaat akuersissummik qinnuteqartoqqaassalluni. Qaqutigooqaaq akuersissusummik peqaratik naammattoorneqartartut.

Oqallisissiaqartup tikippaa, 2009-imi politiit ikiaroorartumik, qanoq annertutigisumik arsaarinnissimanerat. Sulili taamatut pisoqarsinnaasarnera ilimanaateqarluinnarneralu innuttaasut eqqartuinnartarparput. Qangamut sanilliullugu, nakkutilliinerup allanngorsimanera innuttaasut akornanni oqallisigineqarluni maluginarneqartarpoq.

Sineriassuatsinni nammineq angalaartarnitsinni, angallatit tingerlaatillit illoqarfinni nunaqarfinnilu naammattuugassaajuernerisa saniatigut, sinerissami kisaqqasut naammattoortuortarparput. Ujaqqanik naleqarluartunik, kisswaviassuit manniinik piaraannilluunniit anngiortumik annissuisarsimanissaat ilimagiinnarsinnaasarparput.

Aap nunaqarfinnut illoqarfinniluunniit Nuup avataaniittunut tingerlaataannalinnik tikittoqartillugu nunaqqatigisinnaasarparput, pisortanilli alaatsinaanneqartarnerisut malinnaavigineqarnerisulluunniit apeqquersornartarput. Soorunami piffimmiit piffimmut, pisortanit malinnaavigineqartarsimappata pissusissamisoorisimassaaq, tamannali ajorluartumik qularutiginarparput.



Arktisk Kommando-p suleqatiserineqarsimanera imminik ajunngilaq, tuppallersaatigiinnassalluguli naammattutut isiginangilaq, nammineq nalunagu, kilisaatit inoqarfinnut qanilligunik, anngiortumik eqqussukkat suugaluarpataluunniit poortorluarsimasut puttaqutseriarlugit imaanut aasassiarisarpaat, ikinngutaasut suleqataasut umiatsiaminnik malugineqannguaratik aalliinnartoqarsinnaasarpoq.

Anngiortumik eqqussuineq pilersaaruserluagaq, pisortaniit paasineqanngitsoorsinnaasarpoq, anngiortumik tuniniaasut aningaasarsilluartarput, atuisut pinngitsuuisinnaajunnaarnikut ilaqutaasullu atugarliuutissinneqartarlutik. Ila anngiortumik eqqussuinersuarmut akiuniarnitsinni inatsisiliortutullu, sulis sorsugassaqaqaagut. Qujanaqaarliuna aamma politiit akileraartarnermullu aqutsisoqarfimmiut qimminnguisa nassaartarnerisigut ikiaroorntumik arsaarinnissinnaasarmata.

Kangerlussuarmiit Qallunaat nunaannut nunanulluunniit allanut timmisartorniarnit tamaasa pas-erput takujumaneqartuaannarpoq. Oqaaseqaatinni aallarniutigaara nakkutilliineq eqiingaffigigaanni suleqatillu attaveqatigilluartaraanni, nunami allamiut tikittarnerat aallartarnerallu pitsaasumik nakkutigineqarsinnaasartut. Soorluuna suleriesimasoq naleqqussartariaqalersimassassasoq.

Uungagooq ukunungagooq innuttaasut unnerluutiginnikkaluaramik innersuussiinnartarsimaneq, innuttaasut tatigisassarullutik qinikkatut apuussiffigineqartarnera uppersaannarsinnaavara. Imaangilaq suleqatigisarsimasat sujumangivissortutut isiginiarsarigikka, ajoraluartumilli uvangaannaangilaq taamatut nalaataqartartoq.

Atassut-miit siunnersuuteqartoq qujaffigeqqillugu, neriuutigeqaarput inatsisartuni oqallinneq kinguneqarluartumik Naalakkersuinnikkut aaqqiissutaasinnaasillu angusaqartoqarumaartoq.

Qujanaq.